

# KE MANA HENDAK DIBAWA...?

(oleh : Ahmad Lutfi)

Terbit daripada keputusan jawatankuasa Jamiah ad-Dakwah Islamiah Singapura yang diadakan pada 3 Oktober 1950 maka suatu mesyuarat yang bersifat mesyuarat umum telah dianjurkannya pada 13 Oktober 1950 di rumah Jamiah yang tersebut kerana menubuhkan suatu jawatankuasa sambutan untuk mengadakan suatu pesidangan seruan-seruan Islam seluruh Asia. Mesyuarat itu bersetuju mengadakannya dengan Tuan Said Ibrahim as-Saggof dilantik menjadi pengurusnya.

Rancangan atau ura-ura ini diadakan dengan anjuran Maulana Abdul Alim as-Sadiqqi penaung Jamiah yang tersebut yang dikatakan akan datang lagi ke Semenanjung Tanah Melayu ini pada pertengahan atau pada penghujung bulan Disember yang akan datang yang khabarnya telah mencadangkan dirinya menjadi pengarsi perjumpaan itu.

Jika dilihat sekali lalu maka perjumpaan yang bersifat “dakwah” ini adalah sangat-sangat baiknya dan tiap-tiap seorang patut menyokongnya terutamanya yang menganjurkan serta mengusahakannya itu seorang ulama yang terkenal dan masyhur yang usaha dan pekerjaannya meliputi semenjak daripada mudanya untuk menyebarkan agama Islam kepada orang-orang yang bukan Islam dan telah banyak daripada mereka itu yang telah memeluk Islam dengan kerana baik iktibar dan usahanya.

Dengan keterangan yang akhir ini maka kita hendaklah mengucapkan tahniah dan terima kasih kepada usahanya yang besar itu dan dengan tidak berniat hendak menyentuh segala jasa dan usaha-usahanya itu maka tidaklah kelak tulisan saya ini dipandang mencapak atau mencela ke atasnya tetapi tujuan saya menulis ini semata-mata memerhati kepada faedah dan manfaatnya yang akan didapati oleh orang-orang Islam di Semenanjung Tanah Melayu ini amnya dan Singapura khasnya daripada usaha mengadakan

persidangan seluruh Asia itu.

Sesuatu pekerjaan yang akan menghendaki belanja dan usaha yang banyak itu terlebih dahulu hendaklah kita fikirkan apakah manfaat yang akan diperoleh daripada pekerjaan dan usaha kita itu; berfaedah kepada umum orang-orang Islam di dalam tempat pekerjaan itu dijalankan terutamanya seperti keadaan di sini yang sangat-sangat berhajat kepada pekerjaan-pekerjaan yang membina untuk kebajikan masyarakat.

Kita telah melihat dan memandang bahawa tatkala Maulana Abdul Alim tiba Kemari pada penghujung tahun 1948 dan selama tiga bulan lebih datang ke mari sebagai dif istimewa kepada Jamiah dahulu maka yang didapati daripadanya ialah mengadakan syarah, syarah dan syarah kepada kita dan untuk kita. Kedatangannya masa itu semangnya patut oleh kerana bersempena dengan membuka rumah Jamiah ad-Dakwah al-Islamiah yang diasaskannya. Selain daripada itu ia menanam dua cita-cita yang besar yang belum dapat disampaikan iaitu “mendirikan Kolej Islam” dan “menubuhkan suatu tubuh yang bersifat tidak rasmi di antara badan-badan agama di Singapura ini”.

Setelah hampir-hampir dua tahun lamanya rancangan menubuhkan “Kolej Islam” itu nampaknya baharu bertunas sedikit-hampir-hampir tidak nampak tunasnya dan rancangan itu harus akan terbiar begitu sahaja dan tunasnya tidak semakin besar jika sekiranya tidak diletakkan lagi baja ke atasnya. Rumahnya telah siap tetapi alat-alatnya tidak ada dan belum diadakan yang menjadikan yang demikian itu terbiar.

Jika sekiranya Maulana Abdul Alim memandang dan mengetahui bahawa barang yang ditanamnya belum tumbuh, maka sepatutnya di dalam masa ketibaannya semula ke mari kelak tidaklah usahanya diadakan kepada perkara-perkara yang lain, seperti yang dirancangkannya itu yang keadaanya

nanti indah khabar daripada rupa maka sudah tentu pekara yang sebaik-baiknya diusahakannya ialah meletakkan batu asas atau mengikhtiyar derma yang luas untuk perkara itu dengan ia sendiri menghulurkan memungut derma itu kepada hartawan-hartawan bahkan kepada kerajaan British sendiri sebab jika diperhati kepada faham-faham pihak kerajaan di Semenanjung Tanah Melayu ini bahawa orang-orang Melayu, atau umumnya orang-orang Islam sahaja sekarang yang dapat dilepaskan daripada faham-faham Komunis. Itu pun menurut fahaman saya jika lambat banyak pula belia-belia yang baharu naik yang telah terpengaruh kepada faham-faham yang membawa bahaya kepada keselamatan negeri terutamanya ke atas orang-orang Islam.

Dengan melihat kepada merbahaya-merbahaya yang bakal menimpa kepada kedudukan orang-orang Islam di negeri ini yang datangnya kelak bukannya sahaja daripada bangsa lain tetapi daripada anak mereka sendiri yang telah terpengaruh yang nampak riak-riaknya ada sekarang di sisi kita sehingga ada yang telah tergamak adanya Tuhan yang telah disembah oleh ayat dan bendanya itu maka menurut pendapat saya inilah pekerjaan yang sangat-sangat mustahak diperhati dan diselidiki dan asasnya itu ialah


dengan segera mengadakan Kolej Islam dan mengadakan siaran-siaran di dalam Islam yang luas yang akan memakan belanja yang banyak yang sepatutnya mesti dibelanjakan – bukannya berbelanja mengadakan perjumpaan yang besar bunyinya tetapi manfaatnya kepada orang-orang Islam disini tidak ada bahkan nanti nama Jamiah dengan kerana langkahannya itu akan jatuh dengan dituduh tidak membuat sesuatu apa pun iaitu sebagaimana adanya tuduhan-tuduhan yang telah kita dengar hingga hari ini.

Jemiah sepatutnya memandang jauh dalam perkara ini.

Saya mengetahui bahawa sudah tentu rancangan Maulana itu disetujui oleh sebahagian pihak mereka-mereka yang ada bercita-cita supaya terkemuka atau dikemukakan kerana sudah tentu di dalam persidangan itu, sebagaimana yang telah lalu, ada sebahagian daripada iaitu gambar kepada keadaan yang serupa itu walau tidak satu pun usaha atau tenaganya ada tetapi gemar menerima pujian-pujian terutamanya puji-pujian yang keluar daripada mulut seorang yang ternama sebagaimana kedudukan Maulana Abdul Alim as-Sadiqqi itu.

Sekarang marilah kita perhati pula tentang bentuk rancangan mengadakan persidangan “Seruan Islam di Selatan Asia” yang dirancangkan itu. Rancangan ini sebenarnya akan memakan belanja yang banyak dan mengambil tenaga yang lebih besar. Jika tetap yang demikian itu maka sudah tentu usaha untuknya akan berjalan berbulan-bulan lamanya dan wang-wang yang dikumpulkan tentu lebih banyak daripada biasa. Apakah manfaat yang dapat daripadanya? Menurut pendapat saya, saya tidak nampak sesuatu manfaat atau faedah yang akan diperolehi daripadanya

(sambungan pada muka 40)



*Perjumpaan kerana menubuhkan pertubuhan agama-agama di Singapura pada bulan Februari 1949 dengan anjuran Maulana Abdul Alim as-Sadiqqi. Pertubuhan ini telah hampir-hampir dua tahun bertubuh. Apakah yang didapat pertubuhan ini selain daripada berkenal-kenalan?*